



## Terenga 3: Hōtaka 16 - Whakapāha

Ko te maioha a Ako e rere atu nei ki te tī, ki te tā, ki te rauika tāngata kua rāmemene mai ki te mātakitaki i tēnei hōtaka whakapiki pūkenga reo. Nau mai.

### Hei Mahi Whakarongo

Anei a Mātai Smith e kōrero ana ki te āhua o te whakapāha a te Karauna ki tana iwi o Rongowhakaata. Anei rā ngā pātai hei whakautu mā koutou:

- 1) Ko wai te māngai o te Karauna?
- 2) Ko wai te ingoa o te marae e tū ana ki Te Papa?
- 3) He aha te Karauna i whakapāha ai?

### He Whakamārama

He aha tēnei mea te whakapāha?

- He tohu i te pōuri, i te manawa pā ki tētehi āhuatanga i pahawa, tētehi kaupapa kāore rānei i tutuki.
- He tūmahi, he tūingoa hoki te kupu 'whakapāha':
  - Kua whakapāha te Karauna ki te iwi. (tūmahi)
  - Kua puta te whakapāha a te Karauna. (tūingoa)

He tauria:

- Aii! Aku whakapāha, e hoa...
- Me whakapāha atu au i te mea...

Anei ētehi rerenga hei tuku whakapāha.

- Mō taku hē (hapa, hara, tōmuri, whakapōrearea)
- Kia manawanui mai.
- Kia māmā mai ō whakaaro.
- Kei pāpōuri mai koe.

### Hei Mahi

#### Activity:

Tāpirihia he kōrero ki mua, ki muri rānei i ngā kōrero e whai ake nei hei tuku whakapāha.

1. ... i tūtuki taku waka ki tētehi atu i te taunga waka o te hokomaha...
2. ... i pā mai te māuiui inapō nei ...
3. ... kei Tauranga kē mātou ko te whānau ā tērā wā ...
4. ... kāore au i kite i a koe e noho ana i te taha manuhiri...

#### He Whakautu:

1. Mō taku tōmuri...
2. Kia māmā mai ō whakaaro... / ... nō reira kāore i kaha ki te tae ā-tinana mai ki te hui.
3. Aku whakapāha, e hoa... / ...nō reira kāore e tae atu ki te whakanui i tō rā whānau.
4. Aii! Kei pāpōuri mai...